

摘藻堂四庫全書薈要

集部

欽定四庫全書薈要

集部

于湖集卷二十八

五至

詳校官助教臣謝登雋



欽定四庫全書薈要卷一萬五千七百三十五

集部

于湖集卷二十五

宋 張孝祥 撰

疏文

乾龍節開啓疏

璠池御駿悵久隔於宸游華渚流虹欣載臨於誕節預

憑衆妙遙贊洪釐尊號皇帝陛下伏願體道希夷凝神
昭曠壽祺天錫順迎滋至之休輿衛星陳佇協遄歸之
吉

又

聖人有作夙聞里社之鳴誕月載臨茲効華封之祝仰
憑慧力恭贊壽祺尊號皇帝陛下伏願體道希夷凝神
昭曠否終必復即期八駿之歸常久無疆茂協九齡之
與

乾龍節滿散䟽

載震夙以開祥式臨穀旦內文明而養正莫望清塵敢
殫率土之誠恭致彌天之祝尊號皇帝陛下伏願緝熙

純嘏保合至和壽等南箕共協皇圖之永禮成北嶽亟
嚴仙仗之還

乾龍節功德疏

襄野問塗高蹈無為之表華封祝壽茂迎可久之祥恭
即殊庭再嚴妙果尊號皇帝陛下伏願既多受祉永孚
于休夙駕言還副君子必歸之望夢齡協永膺聖人得
壽之符

又

駿馭追風悵宸游之久滯鳳編紀日欣穀旦之重臨恭
祝鴻釐載清貝梵尊號皇帝陛下伏願消搖物表保固
天倪問襄野之童終冀迷途之復依西方之佛更瞻壽
量之增

天申節開啓疏

景運有開方廸延洪之祚珍圖疊紀茂當震夙之期恭
依覺地之嚴增祝聖人之壽皇帝陛下伏願體乾剛健
如日照臨天其申命用休遂臻過歷聖人大寶曰位永

保無疆

天申節滿散䟽

探赤水之珠已凝神於象表受泰元之策聊玩意於人間
蓋與造物而同遊則非巧歷之能計尊號皇帝陛下
伏願備兩宮之樂冠百王之徽億載萬年貴為天子之
父九州四海丕承太上之尊

皇后生朝功德䟽

椒風流化於昭內治之修璧月儲精載紀誕彌之瑞增

祝至仁之壽式嚴衆妙之因皇后殿下伏願應地無疆
與天合德開燕祥於甲觀申錫百男之休承色養於東
朝參享萬年之歷

大行皇后僧家宣讀疏

淑德承天方迪二南之化諱音傳遠遽纏九土之悲輒
憑貝葉之文默助椒蘭之慘大行皇后伏願脫人天之
調御從帝釋之遨遊夜月在天湛本體清涼之性秋蓮
著水發靈根定慧之香

大行皇后道家宣讀疏

儷宸極於長秋始基王化望崦嵫於永夜痛極輿情輒
紬琅笈之靈章默助璇宮之仙馭大行皇后伏願悟本
心之清淨識道體之希夷駟玉虬而上征徑造西真之
集折瓊枝以繼佩却從姑射之遊

大行皇后齋疏

長秋正位化方詠於兔置脩夜興哀悵莫留於駟馭敢
憑緇褐之侶仰助禋禴之思大行皇后伏願識道體之

希夷悟真詮之圓覺藥宮絳闕陪姑射之神人天雨寶
花超華嚴之法界

青詞

淮西漕司設醮

衆生淪於異物長無超度之期上帝覆以薰慈厥有救
援之闕敢殫誠悃仰冒至真眷茲淮壖頃罹兵劫匪罪
而死不知幾千萬人游魂無歸于茲二十餘歲或葬之
中野而絕子孫之託或鬱為枯腊而失墳墓之依或尸

領之不全或草木之同腐傷心慘目舊哭新冤坐令凋
瘵之餘尚遏和平之喜臣叨將外計念此沉幽惟澀懇
於層霄庶興哀於九地伏願綠章上達絳節下臨注南
斗之生俾謝無窮之苦削酆都之籍溥施蕩穢之恩及
此民編咸躋壽域

元正設醮

太一常居上帝之仁徧覆大千世界衆生之業無窮俯
當嗣歲之興祇卜剛辰之吉歟靈宮而歲事瞻霄極以

祈恩願鑒微衷誕敷隆施

上元設醮

清都紫極隔世幾塵綠簡瑤章通臣一念撰日三元之
始馳情八景之高伏願增衍祺祥蕩除灾穢貫其既往
新以方來錫難老於家庭覃餘休於嗣續

又

玉清嘉會氣實首於上元金簡真儀福用敷於下土敢
宣主德率籲國人敬披致一之誠仰導惟新之慶伏願

輪飈臨夜聖澤如春萬歲千秋仰奉堯年之永五風十雨徧為吳會之祥凡我有生長依道蔭

又

絳闕高居躡千真而下察綠章封事緘一念以遙通當甲子之上元惟王春之正月三官校籍屢書黑簿之愆九氣騰霄滋味黃庭之景載披雲笈恭歛飈游伏願憫此餘齡賜之無事退安田里常遂於豐登燕及子孫更祈於繁衍

十二願

一願一人聖壽二願二儀平成三願三光明潤四願四
序休寧五願五行相應六願六府充盈七願七元降格
八願八表澄清九願九壘皇君垂福祐十願十乘太乙
度灾屯十一願十一耀靈光下燭十二願十二時道氣
常存

建康求晴設醮

常陰之罰乃吏弗虔暑雨之咨彼民何罪人今露宿田

與江通環數州杭稻之鄉渺千里波濤之險疾病饑寒
之既迫通亡蕩析以奚疑仰惟當宁之仁屢放振廩之
詔已缺有秋之望終懷卒歲之憂扣首祈恩撫心無策
伏願宏開矜宥溥示救援稽天之浸潛收不葬魚龍之
宅併日而食弗飽尚全雀鼠之生哀此下民歛時五福

荊州修堤設醮

古之南郡今者西門控吳蜀之咽喉兼襄漢之唇齒兵
戈蹂踐閱四十年版籍凋殘無三萬戶屬故歲有防隄

之失當隆冬興土木之工徭役既多流亡是惕歷三元之初日按八景之真文恭闕靈場肅延霄馭仰贊兩宮之壽俯祈一道之安錫以豐年保其常產貫餘灾於北屋移厥咎於微臣帝之所臨臣不敢悔

遷居謝靈惠王設醮

徧覆包涵實下民之陰隲聰明正直斯百祀以光輝乃眷昭亭山之陽誕惟梓府君之宅受命于帝降神此都不怒而威有感斯格閔孤生之流落錫嘉夢以丁寧俾

奠攸居第安汝止仰明靈之昭荅俯危跡以震驚恭按
真文具嚴報禮所冀雲霄之馭來臨仙闕之祠儻闔門
益荷於純禧將永世畢依於大道

謝火災設醮

天愛斯民欲其逢吉吏媮厥職所以致菑益二千石之
非賢俾十萬家之屢警拊心自悼稽首知歸冀矜宥於
叢霄遂輯寧於比屋匪臣私禱惟帝博臨

設九幽醮薦所生母

終身之恨弗逮於慈容小己之私可干於洪造啓盟真
之玉籙嚴欵聖之瑤壇頓首求哀齋心望報伏願垂恩
九地申敕三官或已注南斗之生則冀福齡之延永或
猶滯鄴都之對則祈罪苦之蠲除交胥蠶於幽潛通爽
靈於夢寐更令同氣均此殊休

代揔得居士保安第三弟設醮

人愛其子惟疾之憂天聽自民必從所欲伏念臣第三
男臣孝直尠於福植幼也多艱涉秋以來病滋為崇閱

日既久藥且不持悼賦質之奇偏懼夙緣之多累非歸
誠於造化寧有望於安全恭按靈科具申哀禱仰冀雲
霄之澤不遺草芥之生俾終協於大和誓永依於至道
謝過設醮

三塗苦趣流轉無窮八景真科超躋有道具輸危懼祇
冒聰聞伏念臣涉世之難惟天是恃謂將晚節稍遂安
居餘孽未除叔子云逝雖脩短不逃於物數然咎休率
繫於人為輒歸命於紫清庶蠲名於黑簿雲霄降格雨

露均霑俾微生蒙宥過之恩而已死追沉幽之苦更隆
鴻施俯暨羣倫

釋語

請道顏住撫州報恩疏

大雄一隻虎震伏羣魔揚歧三脚驢蹙四海欲振當年之門戶須煩本分之宗師顏公禪師傳妙喜之衣得
圓悟之髓日光玉潔雷厲風飛噴香爐之紫烟叵堪滿
戶之屨懷錦宮之春色忽尋上峽之船惟法眼之道場

實萬庵之舊隱雲無心而出岫水有時而回淵莫辭振
錫之游再結繡經之社休去歇去尚堪一行瞻之仰之
如是三請

請恩老住蔣山疏

陝府鐵牛脚力負萬鈞之重石霜角虎眼光搖百步之
威欲轉無上法輪須還本分尊宿恩公長老一生打硬
四海知名楊岐栗棘蓬當仁不讓國師無縫塔此義却
諳截斷衆流壁立千仞乃眷鍾山之勝地實繫圜悟之

昔游俗駕初回潮音未振考之公論僉欲師來拗折竹
箏且與逢場作戲橫擔拄杖直須覲面相呈稽首妙華
王請祝聖人壽

請三祖長老疏

陝府鐵牛脚力負萬鈞之重石霜角虎眼光搖百步之
威須全提向上之機關始克振作家之號令厥惟勝地
今得偉人某人斤斧叢林鑪錘古佛金剛王之寶劍截
斷衆流秘魔巖之木叉宏持末法諸公刮目學者傾心

睽三祖之道場在羣舒之佳處吳陂瀉碧龜魚樂得於
主人滿嶽摩霄龍象將依於法席用勤勸請實冀肯臨
飛錫度江豈獨慰西州之父老傳衣此地庶不辜後代
之兒孫願聞法鼓之鳴要看草賊之敗

請亮老住報恩疏

佛法見前惟嫌揀擇衲僧分上便合承當亮公長老徧
歷叢林屢開法席一莖草化成寶刹夙具神通三條篾
緊束肚皮最諳枯淡惟報恩之勝處崇永祐之真游不

有當仁孰嚴上善三十年事鹽醋要還舊日家風二千
里賣布單且看新人作略

請舜老住浮山疏

三千大千揔は無邊佛刹一箇半箇難得本分道人但
看直下承當且教逢場作戲舜公長老入華嚴海得解
脫門牢絆草鞋飽參知識撒開布袋歷勘諸方留須水
以彌時會浮山之虛席殷勤屢請珍重此行菩薩子喫
飯來且與鐘魚作主好阿師怎麼去要令龍象依仁二

千里外不得嫌人三十年後切忌錯舉

請鑑老住潭州東明崇教寺疏

浮休居士昔守此邦東明觀音初出廢井神光煥發寶
刹崇成檀施滿門曾安五百衆荆榛塞路將欲四十年
會茲淫雨之蓄缺我有秋之望肅齋致禱響答不違香
火未收陰雲解駁吏民絕嘆豈有前聞僚案僉謀當嚴
報禮主僧老贖破屋歌傾冥搜當仁喜得此老伏惟鑑
公禪師支撐末法領袖諸方盤結草庵曾到孤峰頂上

撒開布袋何妨十字路頭况惟今是老人乃是吾家請
主為公着力何患不成惟佛有緣所當外護撞鐘打鼓
今朝震動於三湘刻石鑄金異日流傳於四海

請無著住資壽就報恩開堂疏

明月堂中昔分半坐采蓮涇上今建刹竿不憂此道之
無傳賴有斯人之足慰人天合雜山水清明資壽無著
禪師具大揔持證不思議洗滌諸方五味吞楊岐之栗
棘蓬降伏一切羣魔用妙喜之竹簞子獨會先師之意

卓為後學之宗四海無人千聖推出伏願慈悲攝受方便舉揚以心傳心山頭老漢元不死惟佛與佛汝等諸人皆可為敬焚一瓣之香增祝兩宮之壽

于湖集卷二十五

欽定四庫全書薈要卷一萬五千七百三十六

集部

于湖集卷二十六

宋 張孝祥 撰

釋語

請龍牙長老疏

虎谿寺裏曾聞嘯月吟風龍牙山中更看拏雲攫霧當
仁不讓易地皆然混融禪師具足神通綱維象法一絲
不掛無人無我無衆生萬境皆融能縱能奪能殺活歷
徧東州之名剎未登南嶽之曾顛偶尋上水之舡肯振

飛空之錫三千世界不妨到處嬉游七十二峯政要從頭點檢

請北禪長老疏

妙喜既亡卍庵復往國師無縫之塔弟子誰諳楊岐金剛之圈諸方不會必有嫡傳之嗣來興已墜之宗珠公長老法治祥金禪林偉幹摘神龍之頷獨收無價之珍生老蚌之胎真是寧馨之子頃由臨汝徑隱康廬遇坎乘流聊當適意逢場作戲況是知音我為東道主人君

作北禪長老彈千相之雀莫輕上妙摩尼照十乘之車
遂遍無邊刹海

請新首座住福嚴疏

十字街頭彌勒撒開布袋孤峯頂上德山盤結草庵况
茲古佛道場祇是吾家舊物不要客僧作主須煩首坐
燒香新公長老性悟真詮腳踏實地泊舡淺水久矣淹
留韞玉空山自然光彩疇昔因緣已定如今時節到來
便將舊店新開切忌衆生作例好阿師恁麼去何妨覲

面相呈菩薩子喫飯來却是無法可說宜從衆請用報
國恩

殊公住嶽麓惠光寺疏

湘西佳景嶽麓精藍方丈久虛其人使君今有此客殊
公長老面如滿月額有圓珠枯木堂中隨粥飯緣坐處
不落第二臺山路口有多少衆問時便契前三君如洗
脚上舡我是因風吹火不起於坐只今直入道場偶爾
成文領取見成公案

請珠老住公安二聖疏

一切衆生各具自然之眼十方諸佛初無人爾之心至
於舉拂拈槌嘲風笑雨豈云妙法無法大是指空說空
然業識與生而俱迷或冥行至死而不悟不有開士曷
暢真乘珠公禪師傳臨濟真宗授卍庵密印庭前栢子
何曾仗境分踈石上蓮花到處為人說似眷菩薩應真
之化境乃安公著迹之精藍大開選佛之名場思得住
山之本色孤峯頂上要觀出世因緣十字街頭莫惜隨

時演唱見幾而作快便難逢願垂惻隱之慈俯徇殷勤之請

烏江廟門疏

繡裳畫袞方瞻王制之嚴寶字璇題洊被天恩之渥仰
威靈之肅振惟輪奐之未新宜崇朱戶之居益壯烏江
之望憑高配極會看妙絕之宮墻吉日良時即下鏘鳴
之玉珥

蕪湖脩浮橋疏

萬家之邑百賈所趨一溪之橋累歲不葺繫破舡之六七當駭浪之千尋溺馬殺人習為常事饒蛟羈鬼實使甘心所願因民病涉之憂遂為此邦無窮之利入谷斬木造舟為梁不日成之吾事濟矣度人斯衆但看百步之脩攔得福甚多共脫三塗之苦海

代摠得居士東明施財疏語

夜夜放光傍人不見時時得夢獨我自知共惟浮休先生今者摠得居士過去見在事同一家原始要終業通

三世欲纂昔賢之墜緒重嚴大士之寶坊答一時救護之恩崇此邦祈禳之福若男若女咸歸生育之仁曰雨曰暘屢報豐登之瑞

病愈答願供佛道場疏

六道三塗無非厲虐十方諸佛普示救援載軫幻軀夙依真諦屬有負薪之疾願薦伊蒲之羞精神所加昭應如答未修報禮每惕初心驚半夜之鐘常交於夢寐求三年之艾又爽於節宣用敬復於前言以導迎於新社

伏願徧周沙界悉坐道場聞秘密言而除貪嗔癡受甘露味而得戒定慧使衆生業障因法施而蠲除則弟子沉痾當不藥而清愈稽首阿難教為我大醫王

南山昭慶觀音障坐偈

南山昭慶白衣觀音作始何人如此相好地僻寺古僧無卓錫空堂巋然徒四壁立香火已絕而况莊嚴稽首大士本來無住一絲不掛清淨法身况此塵垢而可汙染但此末法冥頑不靈不知即心是觀世音來瞻慈相

乃起恭敬則此慈相不可不葺合掌贊歎諸善男子各
捐薄少隨喜護持俾道人素作高廣坐及其屏障飾以
金碧前列供具熏爐華燈祇十萬錢具足圓滿諸善男
子一彈指頃而此殊勝億劫常住

吉祥寺經藏疏

五千四十八卷尊經藏之金匱百萬億那由他諸佛同
此道場常轉法輪乃安斯室齋厨不繼可憐野寺之殘
僧斤築隆施須煩寶積之長者肯捨太倉之一粒便成

廣廈之千間莊嚴不思議功德山安住無邊際華嚴海
為第二妹設水陸疏右語

諸佛等慈廣有救援之路衆生諸惱莫如疾病之侵俯
惟同氣之微偶愆勿藥之喜方輸危惴即底泰和曉然
夢寐之間示之肝蠻之報用亟修於淨供庶祇答於能
仁萬劫狴牢冀脫幽沉之苦大千川陸悉蘄悲樂之均
更哀佛力之無邊益侈家庭之後福

宗琰作永寧寺鐘成欲作鐘樓記講師求子開

疏信筆書此數語以勸施

稽首我導師方便度一切衆生執若故不見本來性以是勸布施捐頭目髓腦身命尚可捨而況於財物今此大寶鐘辛苦所成就無量佛聲海四海所願聞以無鐘簴故猶與無鐘等我觀此都邑衆寶之所聚而彼富長者皆受佛記別佛欲警拔故令作此鐘欲勸布施故復作大寶簴不思議功德在汝一念頃我為汝說偈發汝喜捨心圓滿清淨業證無上菩提此鐘橫撞時汝等皆

作佛

方廣元公刺血寫經偈

稽首如是經萬行首楞嚴覺元古尊者刺血之所寫尊者住世時寫經百千卷以字以畫計數與河沙等自其一畫初以至絕筆時念念相接續無一不同處翻覆風水輪劫火大千壤此心未嘗動此筆亦不停尊者今寂滅誰識寫經意我為汝演說尊者所記蒞衆生與諸佛同出一父母我血佛身血初無差別相佛從此血中放

百寶光明如月貯瑠璃根塵悉清淨而我矢溺囊溷雜
諸濁惡業欲自纏繞頃刻即腐敗尊者為是故哀憫於
一切故以我之血書佛所說經令汝愚癡人頓見本來
性佛經與我血還復成一體經盡血亦盡佛與我俱無
尊者下生時汝等成正覺

摠得居士命作為平國弟度僧疏

駒犢之愛已荷於等慈龍象之依嘗深於夙願顧年齡
之尚幼恐歲月之或淹惟慧海師實平時之知舊而優

婆塞自有生而薰脩度已度人是同是別伏願諸佛護
念大衆證明俾此善男子速證於菩提則我長頭兒同
增於福壽

追薦六二小娘子水陸疏

代摠得

人誰無死獨抱難言之冤佛是真歸冀垂垂救之力亡
女六二娘怨親融釋體性圓明知住壞之俱空忘生平
之不滿徑超十地永脫三塗及兩孤兒獲無量福

重修三塔偈

七澤所潛十年九潦三塔雖在四壁常空仰衆佛之尤
奇念殘僧之益少化身千百億莫非為物慈悲彈指一
刹那孰肯隨緣布施爾時居士復說偈言

寶塔元不壞因汝有壞時但使塔重成汝得不壞果

妙定化僧偈

行者要作僧妙定欲說偈因緣啐啄時見者須撒地圓
頂更方袍諸法從此起誰具大神通成就一彈指

出隊疏

此大蘭若蓋古道場野寺殘僧齋厨不繼震風凌雨棟
桷隨歌惟世尊住華嚴界海到處見成願佛法付有力
擅那不應坐視宜分薄少來相經營

靈巖行者化僧偈

咸安郡王功德主智積菩薩大道場有善男子名德柔
欲為大僧無度牒我今說偈為勸請願見聞者皆樂施
此善男子得度已俱證無上菩提果

蔣山明老贊

衡陽梅嶺被本師打得觜喙鐘阜長蘆上法座叫得地
動晚年雙徑却遇知音因喫乳糖過多併將漆桶打破
賀賀識渠麼十字街頭每相逢百尺竿頭還蹉過

天禧行者廣如化僧偈

法華十萬餘言度牒三百來貫更著居士疏頭共是三
重公案若要作一串穿自問山頭老漢

卮庵贊

氣骨清羸抱負雄偉江西湖南掀天撲地生子當如孫

仲謀景升諸郎豚犬耳

行者求僧偈

結萬人緣度一箇僧求我說偈恰似不曾

元布袋真贊三首

劫火洞然大千俱壞留得拳頭千妖百怪三十年後此
話行依舊當時元布袋

細入微塵大周沙界與古為徒無乎不在催教彌勒下
天宮卻送胡孫入布袋

劫數茫茫眇此身夢中相見覺非真
常時只笑憨皮袋
十字街頭等箇人

乾明舜老度弟子求疏

學道參禪不必僧
祖師元是嶺南能
若無向上真消息
鬚髮除來只可僧

出家須要護身符
錢在檀門不可呼
乞與青銅三十萬
大葫蘆結小葫蘆

應庵老偈二首

應庵老子六十我已新添一年欲話元正啟祚山僧約
我茶邊

涉世須三洗骨憂時定九回腸借我昭亭一榻伴師掃
地添香

于湖集卷二十六

欽定四庫全書薈要卷一萬五千七百三十七

集部

于湖集卷二十七

宋 張孝祥 撰

祝文

東明觀音祈晴文

一年之望在茲杪秋常陰之災至於閱月禾已熟而弗
獲歲垂成而反虧誰哀斯民我有大士伏願迷雲開廓
慧日照臨畢此場圃之功衍其倉箱之積一刹那頃肯
運慈悲無邊衆生皆得飽滿

謝晴文

八荒同雲一雨十日雖大田之多稼蓋平陸以成江仰
慈願之宏深成歲事於俄頃香烟未斷霽景先開惟此
寶坊夙嚴之功用為無邊豐登之報

祈雨文

三湘之區比歲不熟乃今七月復以常暘風霾未休陂
澤弗戒吏則失職民其何辜頓首求哀齋心望報賜之
一雨惠我豐年百穀用成四海蒙潤

謝雨文

旱魃為虐實深民憂靈雨既零頗寬吏責仰荷生成之
賜敢忘昭謝之誠尚冀宏仁益終大惠

祈雪文

嗣歲將興嘉雪未應既闕豐穰之兆且虞疾癘之多歸
依窳堵波之仙覬覦平地尺之瑞陰雲合雜風霰飄零
雖違三白之占亦慰九豐之願薦伊蒲之供敢忘報禮
之修望來牟之貽尚冀慈休之廣

謝雪文

並江而西歲窮不雪土脉焦槁民憂疾厲吉蠲致禱神
則昭答三日之雨繼以飛霰宿麥敷潤寒氣乃周惟神
之休敢忘拜賜

南嶽謝晴文

環湖南之境田之以畝計者不知其幾千百萬而民之
嗷嗷望歲者又不知其幾千百萬也若夫疇昔之雨再
宿不止田盡入於水已熟之禾盡壞為吏者誠皆以罪

誅斥不足道而民安取食嗚呼噫嘻岌乎殆哉夫既走
禱於帝神內揆蒙暗帝神不顧享然而卒賜之則帝神
哀此民而臣某無以獲此也祇率僚吏申款祠下不敢
私謝敬為民謝

謝諸廟祈雨文

郡縣吏不謹於事神誕降之灾以警懼之廼自夏六月
至於秋七月不雨禾立而槁陂池將竭環視無策是用
致禱於神惟神赦吏之愆哀此下民惠我有年沛以甘

澤吏得苟安其職神亦永有染盛

寺觀謝雨文

七月不雨方深卒歲之憂三日為霖遂愜有秋之望具
嚴報禮申輯齋盟仰冀博臨益垂善應螟螣不作迄臻
場圃之成蠻獠既安長無疆場之擾

又

全楚之區頻年告旱望此一稔尉茲羣氓方投懇禱之
誠果報霑濡之賜興農工於錢鎛寬吏責於簡書謂天

蓋高無德不報願廣不言之利以畢有年之祥

迎嘉顯孚濟侯求雨文

望神之來以日為歲飈輿在望亦既勞止一觴門迎祇薦微衷隨車之澤立冀昭答

祭嘉顯孚濟侯文

惟神廟食茲土赫然威靈司雨暘禍福之柄以受寵天子列於通侯今久不雨陂池枯竭民以病告神亦遠顧臨之矣忍視此嗷嗷而不賜之以膏澤耶牲肥酒香敬

薦厥誠三日之霖拱立以俟

又

神不以守之愚肯顧臨之惟室宇庳下不足以揭虔安
靈願神亟賜甘澤當作新室于州之郭使民朝夕承事
雨暘豐凶厥有常數所以致禱於神亦曰神將閔吏之
愚軫民之不獲誕告之帝招呼風雲闢闔陰陽捐咳唾
之施惠我千里燕及四鄰如是而已

又

奉神妥靈亦既有日昨莫之雨僅足以濯熱而清塵負
郭之田龜坼如故豈神終不顧哀此邦之人也耶抑吏
薦羞乞靈未臻其至也有牲登俎有酒清醕有擊斯鼓
有巫紛舞神來不來使我心苦

公安二聖祠祈雨文

春氣已敷時澤弗降人牛俱病川瀆揚塵惟我二如來
比此一都會飲食必祝疾痛則呼願起光明之香雲遂
澍甘露之法雨潔齋以請昭應為期

請顯應彌勒瑞像祈雨文

自冬徂春累月不雨癘疫交作鬱攸屢驚井泉一空天
霧四塞旱既太甚變不虛生哀此下民繫我大士伏願
慈雲普覆法雨均霑運諸佛之神通慰一州之繫望

奉安新廟文

惟侯威靈達於四境物阜人安無有疵癘歲月滋久壇
壝弗修無以揭虔無以妥靈我是用懼即於新宮新宮
既成既成翼翼侯居其中遺我遐福匪清斯酒匪潔斯

牲以慶其成來止來寧

祈晴文

惟天子以農桑之政寄之吏惟上帝以雨暘之柄司之神吏相其業神節以時各稱厥職今麻麥未登而淫雨踰旬吏用齋戒以望於神假以三日之晴則農事斯畢吏塞其責而荷神之德厚矣惟神實圖之

謝晴文

皇靈昭宣百神受職曰雨而雨曰暘而暘雨暘以時農

事俱利此邦之民實無常心雨好晴佳惟其所欲比以霖潦謁於靈祠香火未收陰雨四歛桑麻滿野黍稷登場荷神之休無所昭報五風十雨格以豐年惟神之靈終此大惠

皇太子疾亟謁廟文

某奉丙申赦書皇太子偶爽節宣之和既肆大號盡宥囚繫又勅守土之臣敬走羣望以蘄勿藥惟皇太子毓德青宮仁孝聰明聞於天下社稷宗廟之靈所宜右助

何恙不已惟神受職當體兩宮系念之重儲祥薦休使
皇太子即日康復以釋兩宮之憂以慰四海之望

到任謁廟文

某往來湘中三年矣風聲氣俗亦略究知撫摩安集之
政不敢不勉以企前躅惟神尚右相之使克有所施設
先聖廟文

某起自諸生冒天子民社之寄晝夜祇慄懼弗克任惟
吾先聖所以教某者具在方冊不敢不勉服事之始敬

拜廟下尚惟聖師相其微衷

后土東嶽文

下臣蟣蝨天子使守民社服事之始敢敬有謁匪祈厥私冀以及民

諸廟文

某以蒞官之始祇謁祠下不敢私禱惟區區之心願有以及民尚陰相之俾克有濟

致語

湖南宴交代劉舍人

珠幢玉節來宣上將之威赤舄袞衣歸授元臣之柄乃
眷門闌之舊獲承尊俎之餘陳九獻之縟儀表十連之
盛事某官聲名四海翰墨兩朝騎麒麟而翳鳳凰遙叢
霄之嘉會射蛟蟻而掩翡翠扈紫禁之清塵主卷式隆
士心景附八命伯九命牧具瞻賜履之雄萬石簞千石
鐘載旌帥閫之伐靜掃綠林之寇嚴趨清蹕之朝望碧
紗之籠久注神仙之籍聽白麻之告徑躋丞弼之司况

嗣建於旌旄實親傳於衣鉢且慰列城之望少為數日
之淹醉我舊官壽公慈母聲流夜瑟莫非鼓舞之兒童
淚點秋竿却是攀留之父老某等幸瞻高宴猥列賤工
敢酌民情上陳口號

年時授鉞許專征蜂蟻千屯一笑清已變耕桑彌曠野
却驅旌旆入神京才從湘水東邊去且到台星極處明
傳語邦人莫留戀使君元是我門生

句曲

十眉就列爭敷要眇之容三穴既空綽有回旋之地宜
呈楚舞再鼓湘絃上悅台顏後部獻曲

荆南宴交代方閣學

高牙大纛來威江漢之濱閑館珍臺去躡星辰之上疊
兩世無窮之契侈一時創見之榮符節親傳尊疊夙設
伏惟某官學該今古名滿華夷元老克壯其猶既宣竭
四方之力廷臣無出其右盍登延三事之司上永懷夜
半之詢公雅動秋風之興綠章封事重違勇退之言黃

紙除書即是催歸之詔細數授衣之月預占拜袞之辰
某官敢謂交承寔均子姓九門置鑰已慚糠粃之前五
嶺建旄未覺規模之遠亶如今日復接後塵萬旅連營
肅中嚴之鼓吹十眉環坐紛合奏之笙歌期慰父老之
情敢奉俳諧之語

蓋世英名五十年功名久合冠台躔只從紫塞傳歸詔
便上黃扉領化甄事契兩家應更好節旄三鎮適相傳
荆江便作松江看小駐秋風下水舡

于湖集卷二十七

欽定四庫全書薈要卷一萬五千七百三十八

集部

于湖集卷二十八

宋 張孝祥 撰

定書

下定書

門館游從早託金蘭之契衣冠歆豔共稱冰玉之賢儻
非姻好之求孰識交情之厚伏承令女閨房挺秀某男
中饋偶虛雖文采風流難繼乘龍之喜而幣帛筐篚聊
陳執鴈之儀但顧衰宗有慚嘉偶

送禮書

門閭甚盛素高冰玉之稱聲氣所同願託葭莩之好惟
季女蘋蘩之未采屬大兒水菽之乏供儻能撫有其室
家抑亦親承於師友共陳不腆用締無窮

六二弟定沈氏書

同氣相求早傾風義嘉耦曰妃願締歡盟伏承令女賦
德靜專久閑母訓而某姪孝覽秉心寒苦頗讀父書惟
臭味之不殊故攀援之敢冀徼福先祖假寵衰宗爰契

我龜既協三星之吉言秣其馬願觀百輛之將

回韓子雲定書

望宗國之喬木必有世臣詠澗濱之采蘋庶承先祖某
之長女僅若而人有如君家猶子之賢飽聞諸公平昔
之譽願交久矣託契欣然腆儀來家永好無數莫如韓
樂敢同蹶父之相攸固有平貧終慚張負之子女

回沈子直禮書

甚似其舅早聞宅相之賢僅若而人儻遂家肥之喜誤

金方田人卷二十八
拜委禽之寵終慚鳴鳳之占非公焉有此甥宜妻以兄
之子鹽絮詠風前之雪敢擬昔人箕帚堂上之塵庶
無失職

回韓松卿定書

閨閤之華大非其耦婚姻之託初不敢聞遂成永好之
堅實繫嘉命之辱伏承令子提宮直閣被服寒素不怙
富貴而驕其姪女四八娘生長賤貧頗知正順之守鴈
幣來寵龜占亦從僅若而人得事君子習母師之訓敢

云張仲孝友之風承舅姑之賢庶圖韓姑燕譽之喜

題跋

跋山谷帖

字學至唐最勝雖經生亦可觀其傳者以人不以書也褚薛歐虞皆唐之名臣魯公之忠義誠懸之筆諫雖不能書若人何如哉豫章先生孝友文章師表一世欬唾之餘聞者興起況其書又入神品宜其傳寶百世恭聞徽宗皇帝評公之書謂如抱道足學之士坐高車駟馬之上橫斜高

下無不如意聖人之言經也晚學小生尚安所云

跋道德經碑

荊州開元觀直牙城西五百步有南極注生鐵像祥符八年更為天慶觀紹興五年遷觀楚鎮門之東舊觀廢乾道五年春某與客過焉像在壞垣中覆以竹屋後積草草中小碑高三尺即初建天慶觀記去草見碑碣隱隱有字洗刮久之可讀蓋唐明皇所注道德經是時詔天下道觀皆立經幢因火中折天慶之

役官吏督促妄道士不暇它求石即取折幢穴其腹
植碑焉經文行草注楷法行間茂密唐經生固多善書
然此或非經生所能辦也既還碑天慶發地出趺合方
得三千餘字剥缺斷續益奇古百夫輦致文公堂下歷
陽張某識

題王朝英梅溪竹院

朝英童子時與余同師已而同登名天府不見十年壬
午春余自建康還宣城道過朝英所居為留一夕朝英

誦近詩數篇句法清麗方築屋竹間聚書謝客益豐所
學蓋朝英之進而及於古未可量也張子曰夫士惟學
而後知不足今朝英不以其能自畫車堅馭良策之以
無倦異時余將復訪朝英於竹院則其所稱歎又不止
於詩而已也朝英尚勉之閏月既望張某安國題

讀謝夢得文

夢得天下之奇士彼齷齪者固不足以知之其文浩瀚
如卷東海而注之江河奇偉激越紛萬車甲馬而爭馳

視其外則枯木寒灰槁項黃馘若真無意於茲世者之所為

題龔深之侍郎太常奏藁後

元祐諸老愛君之心切至正人倫於夫婦之始當時曲臺議禮則此四君子在焉烏乎盛哉辛巳春正月上吉跋周德友所藏後湖帖

德友少時趣尚奇偉一斗百篇諸老先生慕與之游今歲晚矣訖未有識一飽之不謀可嘆也右後湖書帖自

甲軸至己紹興二十八年三月望

題蘇庭藻所作張漢陽傳

漢陽一節視古無愧而庭藻猶以成敗為言何也鍊石
補天斷鼇立極雖不吾以吾其與聞之

題真山觀

張安國設道供於真山觀飯已同郭道深滕子昭吳仲
權陳叔憲聯騎訪無無道人登永寧寺閣遂入西山煮
茗於超然亭北風欲雪諸峰獻狀景物之勝不知身之

在嶺表也乾道元年十一月七日

題楊夢錫客亭類藁後

為文有活法拘泥者窒之則能今而不能古夢錫之文
從昔不膠於俗縱橫運轉如盤中丸未始以一律拘要
其終亦不出於盤蓋其束髮事遠遊周覽天下山川之
勝以作其氣所與交者又皆當世知名士文章安得不
美耶余官荆南夢錫自交廣以客亭類藁來精深雄健
視昔時又過數驛讀之終篇使人首益俯焉歷陽張某

安國書

題陸務觀多景樓長短句

甘露多景樓天下勝處廢以為優婆塞之居不知幾年
桐廬方公尹京口政成暇日領客來游慨然太息寺僧
識公意閱月樓成陸務觀賦水調歌之張安國書而刻
之崖石

題蘇翰林詩後

右翰林侍讀學士贈太師魏國蘇公之詩乾道丁亥三

月望張某過金山長老寶印作堂上方請名於某敬取
公詩中語名之曰玉鑑而書其詩使刻山石

題單傳閣記後

去年九月某守建康公行部至郡嘗見屬書此記時文
未具也今年夏某將赴桂林道過隱靜則記成而公蓋
死矣感慨以泣敬如公志

題陳擇之克齋銘

陳琦擇之名其齋曰克張敬夫為之銘某復為書聖師

問答與敬夫之銘置齋中左右序乾道丁亥七月張某識

題所贈王臣弟字軸後

王臣弟不見二年頽然而長學業甚進以此軸求作字不能佳也

于湖集卷二十八

謹案卷二十五第四頁後三行案青詞疏詞等作
非文章正軌此集止於抄錄姑仍其舊謹識於
此





總校官庶吉士臣張能照

校對官中書臣葉蘭

謄錄舉人臣馬衍宗

謄錄舉人臣任銜葵

欽定四庫全書薈要

集部

于湖集卷二十九至
三十二

詳校官助教臣謝登雋



欽定四庫全書薈要卷一萬五千七百三十九

集部

于湖集卷二十九

宋 張孝祥 撰

墓誌

湯伯達墓誌



湯氏諱砮處州青田人也大丞相榮國公之長子

贈太師衛國公之孫太師申國公之曾孫歷官右承務郎承奉郎監潭州南嶽廟主管台州崇道觀授浙東安撫司主管機宜文字未上而卒娶潘氏一女六歲嘗生

二男子堅老頑老皆未晬而夭伯達葬於隆興之改元
在麗水縣東度溪過峽嶺距衛公之墓隔一山三百步
許其名曰東塘蓋伯達生於紹興之己未而終於紹興
之辛巳年二十有三而止耳嗚乎悲夫痛哉丞相以書
謂某曰余子幼而愿不好弄長而益恭每拱手危坐終
日讀書外未嘗他語余與朋友論古今及人物處其旁
應唯唯客去徐理前語道是非陳可不皆出人意表紹
興丙子朝家申嚴試闈之禁宰執子弟莫敢應書余待

罪政府科詔兩下皆不赴間居作詩苦思至忘寢食詩
成識者以為深病方亟適余生朝猶自力為百韻律詩
以為壽其勤如此嘗鼓琴後亦置之餘無所嗜好也紹
興庚辰余免相奉祠余子留其孥於婺而從余歸鄉來
年正月聞其初生子病冒大雪涉峻嶺往迎之二月歸
感嗽疾余以是寒氣之所薄行愈矣涉夏至秋復作增
以脾泄十月余被召赴闕時敵兵既大入抵和州人心
惶駭余受命當疾赴顧念其病未能決迺諗余曰國家

事急大人當行某病未殆也詔以二十六日至余以二十七日行送上車無一語拭淚而別余心惄然若有所失而不忍言也至行都每五日或七日必得書云疾稍間矣至十二月不得書者旬日余驚焉時敵帥死兵車駕視師余為留守十日得書語文而字指凡兩紙數百言余默念彼久疾廼精明如是是誠愈耶書來之明日家中報以病且亟又明日得報又翌日而訃來余苦毒恫傷不知身之有無也嗚乎彼書之詳且謹是誠與吾

訣也余雖遭此禍而縻筦鑰不能去既而移守紹興今年之三月始得歸視其殯追思前歲之別生死縣隔一何寬也余至家凡三月四視其殯六月十三日余復被召廼酹哭而別焉既而行於旁近萬山回掩中為平田曰是可為墓以葬余子託所親葉君遽訪焉且卜之以書來曰是地良吉既築垣而甃壙矣仲冬丙申於葬為吉不可易也嗚乎人之愛莫父子若也余子愿而文又甚愛之其病也不能躬理其藥餌以至於死死而不親

歛焉今余蒙恩復相累丐歸不能遂其葬也又將不復
送焉揆之人情吾之哀可勝道哉末如之何矣姑集其
平生以告於能文之君子為余志其墓以寄余哀其可
矣然吾子少而死無可紀者也無可紀而猶為之志所
謂余情之哀不能已而托於是焉者也古之表墓也以
官爵著哀榮之義也余子假蔭而官未試而死官爵不
足言也古者幼名冠字余子之亡其得字也蓋三年耳
嗚乎可哀也哉安國於余特厚今敬頌安國為銘余子

之墓且篆其額曰湯伯達墓題其首曰湯伯達墓誌銘
以志余無窮之思焉蓋丞相之書如此嗚乎悲夫痛哉
昔者某登丞相之門雖不識伯達而知其為賢也夫賢
而早死天下之所哀也而況丞相父子之間也哉丞相
幸教某命某以銘敢辭銘曰

止乎若拱而窺行乎若僂而隨儼容服之在側忽不見
兮焉之甚媿兮好脩珮寶璐兮冠琳璆問塗兮萬里蹇
將駕兮摧輶東塘之水兮汙汙山回阻兮此藏夫君後

千禩兮勿毀欲其哀兮視茲刻文

汪文舉墓誌銘

余年十八時居建康從鄉先生蔡君清宇為學清宇之門人以百數有汪氏子膠者小於余兩歲修謹敏銳獨異流輩余亦敬而友之也方是時膠之家在豫章獨其大父字文舉者攜膠以俱欲膠之有成也不復治他事晝夜督課與膠上下卧起居無何膠斬然有聲場屋連取鄉薦號名進士後十年家君奉使淮南膠之父處

仁官舒之桐城亦以才辨治家君薦之蓋膠之學以有
立與處仁之能其官文舉實使之然也文舉今死矣膠
以銘見屬余與膠游二十年余官臨川吳門膠嘗千里
來過其守建康也膠受館於余為直記室余居於湖膠
率兩三月輒一來來即留一月或四五十日蓋與膠投
分如此而文舉能教其子孫又可銘也銘其何疑文舉
之先建康人徙豫章之武寧遂為武寧人事親以孝稱
親亡哀毀過禮雖老矣言及其親未嘗不泣也以是子

孫皆孝謹家饒財自奉甚約至周人之急劇於已事紹興初江西旱米斗數千文舉視其困倉尚可得緡錢十數萬盡斥之以與鄰里有王生坐大獄請盡鬻其產文舉文舉蹙然曰若是則而家何以生耶視其直併券歸之王生賴以免文舉之父字平甫幼孤嘗隨其母適李氏文舉視李氏與汪姓等經紀其家教其子它日李之子有醉而溺死者文舉哭之慟厚葬之膠方試春官未之知也夢衣冠而謝者曰吾而不謹死於水荷君大父

歸骨於土矣間閱內典有得屬續不亂乾道丁亥二月
戊子也年七十有二葬以十一月乙酉祔以夫人李氏
四男子處仁秉義郎監江州甲仗庫處恭處雋為進士
處厚早卒孫三人長膠也珙珪其季也孫女五人歸鎮
江府錄事叅軍張汲將仕郎王嗣宗進士黃廷佐處者
二人曾孫瀛溉文舉名翥文舉之父曰安祖曰弼曾
祖曰岫文舉嘗命於朝得初品官非其好也銘曰
武寧之東長湖之原文舉茲藏後將多賢

高侍郎夫人墓誌銘

余鄉歷陽有孝子曰高祚字子長故吏部侍郎江都公
諱衛之子侍郎薨時子長尚幼凡子長學行卓然能自
揭立不隊其家聲母夫人實教之也太夫人年高樂荆
州之風土子長因家焉以太夫人之樂夫此也子長仕
宦不敢復遠荊州以去蓋於武昌者六年於荊州者二
年於沅州者二年自沅州罷歸太夫人於是七十有七
矣子長請於朝願奉祠祿以養閉門不復出荊州牙城

之東有屋數十楹其傍鑿池植花竹築室其中子長夫
婦日奉太夫人携子若孫遊焉内外千指敬愛雍穆大
夫士慕之者紀於歌詩凡稱事親皆於子長乎取法蓋
如是者又二年而太夫人以疾不起子長毆血骨立親
負土築墳葬之日有鶴飛鳴其上訖事乃去夫以太夫
人享上壽具封邑康寧好德五福備具子長平時未嘗
違膝下生也敬以養死也禮以葬於今之世可以無憾
而子長每言及太夫人涕泣輒隨之悲怨罔極若未嘗

一日得奉承其親者烏乎終身之慕有若子長謂之孝者非耶太夫人諱靜明廬州梁縣人姓王氏年十有二歸高氏生三男子祐承務郎機修職郎前死季則子長也今為右朝請郎始侍郎公及與元祐諸公游嘉言懿行太夫人悉能記之侍郎為太平州判官攝州事山谷來為守謫久貧甚既入境矣復坐黨事免侍郎得堂帖不以告迎候如禮山谷既視印已乃知之侍郎為治歸裝甚飭備過於久所事曾丞相子宣過郡下時公卷葬

母事欲起部使者得風旨遣州都監圍其館脅之侍郎
徒步往揮其衆曰此前宰相坐怨家曖昧事且白汝何
敢爾且我攝州事事當關我即留館中不去丞相以安
既獄具公卷猶坐貶丞相泣語諸子當事侍郎以父禮
凡此皆子長不及知太夫人以告曰汝父不顧身以徇
義汝宜勉之太夫人葬以其年十月十四日在江陵縣
白湖龍山之原太夫人有三男孫墀墀塔三女孫銘曰
八十一年子孝以賢我銘實然龍山之阡

于湖集卷二十九

欽定四庫全書薈要卷一萬五千七百四十

集部

于湖集卷三十

宋 張孝祥 撰

墓誌

邕帥蔣公墓誌銘

乾道元年余守桂林初識潯州守蔣君德施是歲君趨
朝執政三人者共稱君之賢賜對擢守邕管其明年余
免歸江東君與邦人送余於興安置酒擊鮮乳洞之下
時方六月洞中極寒水如冰雪余與君褰裳脫履篝火

入之凌兢石間題名賦詩火盡乃出於是君六十有二
矣精神矍鑠未艾也又明年余帥長沙桂州舊僚以書
來則云君至邕管死矣夫以君之豈弟慈祥忠信孝友
而位與年纔止於此何耶桂州在二廣號稱士鄉其間
固多賢然余之所與游者若君與石君惠叔其尤賢者也
君之沒惠叔蓋亦前數月死故余甚悲之明年八月余
帥荊州君之子礪自桂徒行數千里持惠叔之弟安持
狀君行事求銘於予予方謝府事未間礪至刺血為書

以請夫以余悲君之心而礪之誠孝如此則烏可以不
銘也君諱允濟為桂之興安人父熙以君贈奉直大夫
其葬也得致堂先生胡公為之銘致堂道學高一世語
不妄發奉直之銘可知也奉直力貧教二子君與其兄
允升俱中紹興二年進士第歷柳州柳城尉容州普寧
令改秩知邵州新化縣賀州富山縣新州教授通判賓
州知潯州邕州於是朝廷方知君而上亦且試君於邕
將用君矣而君遂死積官朝請大夫君在州縣凡四十

年一以恩信結民務安便之其出入期會皆與民先為要約無一切迫促之政嶺南取民無藝貧不堪則黠且强者往往羣為盜君所至常平其賦又設方略盜畏之多去易業間發捕必得新化號難治姦民猾吏與寓客之有力者根株囊橐令不得一搖手即以危法中之君至屬爾俗為之變積歲不輸之租車牛係道庫廩皆溢會丁太夫人憂租未至縣者知君去復以歸相率數百人遮部使者願奪君喪在富川適行經界鄙遠不素習

旁郡驚擾有死者君親為指畫條踈節披吏受其成而
民聽之從容訖事部使者取其法下諸郡嘗攝昭州始
官出錢二百予民輸布一匹既復折布為錢十倍之君
疏以聞竟減其半隆興詔書第良二千石君在潯州為
廣西第一嘗按平南巡檢祝尚賢奪一官及君喪過潯
尚賢哭舟中哀甚或問之曰曩我實犯法非公之私公
賢者我安得不哭邕州控蠻獠歲買國馬百貨所聚君
至盡蠲異時武臣敝事馬大入諸蠻帖服至不敢相讎

殺死之日哭者罷市君娶於秦氏生四子砥碩早卒次
礪以君任將仕郎次確又娶王氏有女春娘君之孫男
女凡六人君葬以乾道四年八月丙申在興安縣之趙
村巨木塘二夫人祔焉銘曰

居也孝友仕也循良外甚和愉中乃峻剛惜乎生於南
方仕於南方天子方將用之於既老而君則嗇於數而
云亡也

朱安之墓誌銘

始某不識安之獨聞其賢於某之從父從父與安之游
相好也安之沒其子績績以誌文屬從父從父命某某
不得辭按安之朱氏諱敦仁出漢尚書令暉自會稽徙
鄞五世矣君生十年而孤慎終無違禮朱氏大族外內千
指君壹訓齊蓋居家嚴處已約與人恕自其少時則有
恢厚長者之稱矣舉進士不偶棄歸中歲家益豐益務
施鄰里緩急悉抵君未嘗以有亡辭也晚喜西方氏學
自謂有所得屬疾以後事戒諸子安卧而逝享年六十

有九實紹興甲戌十有二月丁未也曾王父文偉王父
用評父揆夫人徐氏四男子績也績也叔季早死二女
子適王造劉淦造今為山陽簿孫男女十三人九齡九
思九功九舉九德九澤九成女嫁董宏餘未行君葬以
既歿後二年鄉曰句章原曰梅芝月以辛丑日以丙午
銘曰

有淑如君卒不克施有承其休原實委之梅芝之封山
川鬱盤君於此藏既固既安

祭文

代諸父祭伯父文

維紹興二十六年歲次丙子十月己巳朔初六日甲戌
弟具位某等謹以清酌庶羞之奠致祭於先兄宮使侍
制張公之靈嗚呼哀哉我家故微我祖則振何以振之
曰德與仁逮我先君其艱其勤益揚厥光而卒不信我
觀於鄉莫我之貧人孰我怨而咸我親化貪以廉易澆
以醇巍巍陰功與天理并鍾美於公克宏厥因先君是

師少則有稱游於黨庠頽然鳳麟踣厲風發超逸絕塵
徒步入關蜚聲成均擢第以歸謂當親榮陟岵告凶街
哀茹辛終喪筮仕浙河之濱携我諸季奉先夫人則孝
則慈仰事俯循家徒壁立穆然春溫櫬槨北起京輔襁
負慟哭仰天上書扣閤狡童逋誅樞臣提軍以公參籌
亟奏厥勲帝庸寵嘉召見紫宸公矢其謀慷慨自陳忠
憤激發肝膽輪囷主辱臣死臣敢愛身願張皇威於彼
殊鄰宗伯之長異數式敦黃金九環車朱兩輪我出我

疆虎狼續紛驅脅使從九死是瀕公曰我死本朝則尊
唾罵逆豫汝亡無辰義動殊俗野心亦馴顧視介者既
降而髡公欲斬之懼而宵奔遂繫維公犬羊與羣沙漠
雪積煙雲塵昏一節起居面鰲膚皸饑腸齧氈凍衣結
鷄懷闕傾日思親望雲引脰南鄉淚乾聲吞生還何時
十五秋春天子憐公番番良臣我圖爾功其贊國鈞柄
臣忌公公歌小旻外祠延閣淹留海濱母子白首綵衣
更新世賞之渥燕及弟昆風木不停艱疚荐臻三年廬墓

羸然哀哉終老抱疾齋厨無葷茹慙既屏公道乃申一
麾池陽起膺帝綸布政未月恩惠浹淪條疏節披剔蠹
理棼引疾遽還莫諭所云嗚呼哀哉小留歸裝桐川之
陰忽與諸公告訣周諄曰悟大命傾於浹旬乃作治命
累數千言書之簡編標列縷分必以我喪歸葬四明徧
告朋友及郡守丞又移我書如前之陳我之得書震懼
以驚此豈戲耶抑有其徵遽往侍公何疾之嬰飲酒賦
詩歡如平生惟是後前棺槨衣衾我苦謂公棄此弗貞公

笑不答促我以行六月乙未公之初生疇昔之夜既沐
而薰顧謂諸孤汝眠勿興寢以衣冠寂無聞聲旦起視
公則公既薨體柔色敷蟬蛻之輕嗚呼哀哉使以計行
於杭於昇我與季聞靡肝沸心奔走會喪籲天不聞念
我先兄大我宗祊我輩宦學須公以成胥保胥訓先子
是承有德未報去騎箕星二叔安鄂欲來弗能手足同
體翦焉摧傾嗚呼哀哉我公之生松貞蘭芬金石其剛
冰鑑之清終始大節紀在汗青尚須鴻儒墓隧其銘嗚

呼哀哉公之文章如漢兩京渾渾其全鑿鑿其精揮毫
落筆龍蛇矯騰一斗百篇紙價為增敬用纂輯畀之雲
仍嗚呼哀哉我取遺訓一一作程廼茲諸孤婚嫁教令
我輩任責其敢弗欽有渝此言豈無鬼神嗚呼哀哉宅
窆之期卜此歲零小留於郊其居則寧諸孤在傍以安
厥靈逝者不留三虞是臨帝有密章責於幽局匪作斯
文惟以薦誠尚饗

代焚黃祭文

嗚呼皇考之德信於鄉黨而卒不昌其身以啓其後人
不生享榮養而惟有密章之寵以賁於幽局嗚呼哀哉
我之元昆躬承慈訓以大吾家諸弟因仍紳冕則華兄
列從班某仕於朝室有妻孥衣豐食饒念我先君其艱
其勤生我劬勞至於成人菽水之奉曾不一日不孝之
責昊天罔極兩秩賜褒匪敢云報天子有命弗敢弗告
嗚呼哀哉尚饗

亡妻時氏宿告文

嗚呼哀哉自癸未至於戊子吾婦之死於是六日矣越
已丑將殯於寶林之佛寺以俟卜吉而藏焉嗚呼哀哉
爾尚知之乎否

起靈

嗚呼已矣無可言者矣以是為爾之遣奠嗚呼哀哉

敢

嗚呼哀哉吾王母馮夫人皇妣孫夫人實葬四明吾父
母之命將以汝從之吾官於朝未能持汝喪以往也是

以卜敢於此嗚呼哀哉汝奉佛素謹屬續而誦佛之聲
猶不絕今使汝依佛以居吾又時節視汝惟謹汝其安
之嗚呼哀哉

于湖集卷三十

欽定四庫全書薈要卷一萬五千七百四十一

集部

于湖集卷三十一

宋 張孝祥 撰

樂府

六州歌頭

長淮望斷，闕塞莽然平。征塵暗，霜風勁，悄邊聲。黯銷凝。
追想當年事，殆天數，非人力。洙泗上，絃歌地，血風腥。隔
水蒼茫落，日牛羊，下區脫。縱橫看，名王宵獵，騎火一川。
明笳鼓悲鳴，遣人驚。念腰間箭匣中，劒空埃，蠹竟何

成時易失心徒壯歲將零渺神京干羽方懷遠靜烽燧
且休兵冠蓋使紛馳驚若為情聞道中原遺老常南望
翠葆霓旌使行人到此忠憤氣填膺有淚如傾

水調歌頭

為揔得居士壽

隆中三顧客圯上一編書英雄當日感會餘事了寰區
千載神交二子一笑眇然茲世卻願駕柴車長憶淮南
岸耕釣混樵漁忽扁舟凌駭浪到三吳綸巾羽扇容
與爭看列仙儒不為蓴鱸笠澤便掛衣冠神武此興渺

江湖舉酒對明月高曳九霞裾

又 凱歌上劉恭父

猩鬼嘯篁竹玉帳夜分弓少年荆楚劔客哭騎錦襜紅
千里風飛雷厲四校星流彗掃蕭斧剉春葱談笑青油
幕日奏捷書同 詩書帥黃閣老黑頭公家傳鴻寶祕
略小試不言功聞道璽書頻下看即沙堤歸去帷幄且
從容君王自神武一舉朔庭空

又 泛湘江

濯足夜灘急晞髮北風涼吳山楚澤行徧只欠到瀟湘
買得扁舟歸去此事天公付我六月下滄浪蟬蛻塵埃
外蝶夢水雲鄉製荷衣紉蘭佩把瓊芳湘妃起舞一
笑撫瑟奏清商喚起九歌忠憤拂拭三閭文字還與日
爭光莫遣兒輩覺此樂未渠央

又金山觀月

江山自雄麗風露與高寒寄聲

一本作牋

月姊借我玉鑑此

中看幽壑魚龍悲嘯倒影星辰搖動海氣夜漫漫湧起

白銀闕危駐紫金山
表獨立飛霞珮切雲冠漱冰濯
雪眇視萬里一毫端回首三山何處聞道羣仙笑我要
我欲俱還揮手從此去翳鳳更驂鸞

又汪德邵無盡歲

淮楚襟帶地雲夢澤南州滄江翠壁佳處突兀起紅樓
憑仗使君宵次與問老仙何在長嘯俯清秋試遣吹簫
看騎鶴恐來游欲乘風凌萬頃汎扁舟山高月小霜
露既降凜凜不能留一吊周郎羽扇尚想曹公橫槊興

金方口人卷三十一
廢兩悠悠此意無盡藏分付水東流

又隱靜山觀雨

青嶂度雲氣幽壑舞回風山神助我奇觀喚起碧霄龍
電掣金蛇千丈雷震靈鼉萬疊洶洶欲崩空盡瀉銀潢
水傾入寶蓮宮坐中客凌積翠看奔洪人間應失七
筓此地獨從容洗了從來塵垢潤及無邊焦槁造物不
言功天宇忽開霽日在五雲東

又桂林集句

五嶺皆炎熱宜人獨桂林江南驛使未到梅藥破春心
繁會九衢三市縹緲層樓傑觀雪片一冬深自是清涼
國莫遣瘴煙侵江山好青羅帶碧玉簪平沙細浪欲
盡陡起忽千尋家種黃柑丹荔戶拾明珠翠羽簫鼓夜
沉沉莫問驂鸞事有酒且頻斟

又桂林中秋

今夕復何夕此地過中秋賞心亭上喚客追憶去年游
千里江山如畫萬井笙歌不夜扶路看遨頭玉界擁銀

闕珠箔卷瓊鉤
馭風去忽吹到嶺邊州
去年明月依舊還
照我登樓樓下水明沙靜
樓外參橫斗轉搔首思
悠悠老子興不淺聊復此淹留

又和龐佑父

雪洗塞塵靜風約楚雲留
何人為無悲壯吹角古城樓
湖海平生豪氣闕塞如今風景
剪燭看吳鉤
賸喜然犀處
駭浪與天浮
憶當年周與謝
富春秋小喬初嫁香囊未解
勲業故優游
赤壁磯頭落照肥
水橋邊衰草渺

渺喚人愁我欲乘風去擊楫誓中流

又為時傳之壽

雲海漾空闊風露凜高寒仙翁鶴駕羽節縹緲下天端
指點虛無征路時見雙鳬飛舞揮斥隘塵寰吹笛向何
處海上有三山綵衣新魚服麗更朱顏蟠桃未熟千
歲容與且人間早晚金泥封詔歸侍玉皇香案踵武列
仙班玉骨自難老未用九霞丹

又為方務德侍郎壽

紫橐論思舊碧落拜除新內家勅使傳詔親付玉麒麟
千里江山增麗是處旌旗改色佳氣鬱輪囷看取連宵
雪借與萬家春建崇牙開盛府是生辰十州老稚都
向今日祝松椿多少活人陰德合享無邊長筭惟有我
知君來歲更今日一氣轉洪鈞

又垂虹亭

艤棹太湖岸天與水相連垂虹亭上五年不到故依然
洗我征塵三斗快揖商飈千里鷗鷺亦翩翩身在水晶

闕真作馭風仙 望中秋無五日月還圓倚欄清嘯孤
發驚起壑龍眠欲酹鷗夷西子未辦當年功業空繫五
湖舡不用知餘事尊鱠正芳鮮

又送劉恭父趨朝

鼇禁輟頗牧熊軾賴龔黃一時林莽千險遙午要驅攘
金版六韜初試煙斂山空野迥低草見牛羊旒纓釋南
顧戈甲濯銀潢璽書下褒懿績促曹裝帝宸天近紅
旆東去帶朝陽歸輔五雲丹陛回首楚樓千里遺愛滿

瀟湘應記依劉客曾此奉離觴

多麗

景蕭疎楚江那更高秋遠連天茫茫都是敗蘆枯蓼汀
洲認炊煙幾家蝸舍映夕照一簇漁舟去國雖遙寧親
漸近數峯青處是吾州便乘取波平風靜荃棹且夷猶
關情有冥冥去鴈拍拍輕鷗忽追思當年往事惹起
無限羈愁拄笏朝來多爽氣秉燭夜永足清游翠袖香
寒朱絃韻悄無情江水只東流柂樓晚清商哀怨還聽

隔舡謳無言久餘霞散綺煙際帆收

木蘭花慢

送歸雲去鴈澹寒采滿溪樓正佩解湘腰釵孤楚鬢鸞
鑑分收凝情望行處路但疎煙遠樹織離憂只有樓前
溪水伴人清淚長流霜華夜永逼衾裯喚誰護衣篝念
粉館重來芳塵未掃爭見嬉游情知悶來殢酒柰迴腸
不醉只添愁脉脉無言竟日斷魂雙鶩南州

又

紫簫吹散後恨燕子只空樓念壁月長虧玉簪中斷覆
水難收青鸞送碧雲句道霞扃霧鎖不堪憂情與文梭
共織怨隨宮葉同流 人間天上兩悠悠暗淚灑燈篝
記谷口園林當時驛舍夢裏曾游銀屏低聞笑語但醉
時冉冉醒時愁擬把菱花一半試尋高價皇州

水龍吟望九華山作

竹輿曉入青陽細風涼月天如洗峯回路轉雲舒霞卷
了非人世轉就丹砂鑄成金鼎碧光相倚料天闕虎守

箕疇龍負開神祕畱茲地
縹緲珠幢羽衛望蓬萊初
無弱水仙人拍手山頭笑
我塵埃滿袂春鎖瑤房霧
迷芝圃昔遊都記悵世緣
未了匆匆又去空凝竚煙
霄裏

又過浯溪

平生只說浯溪斜陽喚我
歸舡繫月華未吐波光不
動新涼如水長嘯一聲山
鳴谷應栖禽驚起問元顏
去後水流花謝當年事憑
誰記須信兩翁不死駕飛
車時遊茲地漫郎宅裏中
興碑下應畱屐齒酌我清
尊洗公

孤憤來同一醉待相將把袂清都歸路騎鶴去三千歲
念奴嬌過洞庭

洞庭青草近中秋更無一點風色玉鑑瓊田三萬頃着
我扁舟一葉素月分輝明河共影表裏俱澄澈悠然心
會妙處難與君說應念嶺海經年孤光自照肝肺皆
冰雪短髮蕭騷襟袖冷穩泛滄浪空闊盡吸西江細斟
北斗萬象為賓客扣舷獨笑不知今夕何夕

又張仲欽提刑行邊

弓刀陌上淨蠻煙瘴雨朔雲邊雪幕府橫驅三萬里一
把平安遙接方丈三韓西山八詔慕義羞椎結梯航入
貢路經頭痛身熱今代文武通人青霄不上卻把南
州節塞馬秋肥鵬力健應看名王宵獵壯士長歌故人
一笑趁得梅花月王春奏計便須平步清切

又欲雪呈朱漕元韻

朔風吹雨送淒涼天氣垂垂欲雪萬里南荒雲霧滿弱
水蓬萊相接凍合龍岡寒侵銅柱碧海冰澌結憑高一

笑問君何處炎熱 家在楚尾吳頭歸期猶未對此驚
時節憶得年時貂帽煖鐵馬千羣觀獵狐兔成車笙歌
隱地歸踏層城月持杯且醉不須北望淒切

又再和

繡衣使者度郢中絕唱陽春白雪人物應須天上去一
日君恩三接粉省香濃宮床錦重更把絲絢結臣心如
水不教炙手成熟 還記嶺海相從長松千丈映我秋
竿節忍凍推敲清興滿風裏烏巾獵獵只要東歸歸心

入夢夢泛寒江月不因尊鱸白頭親望真切

又

星沙初下望重湖遠水長雲漠漠一葉扁舟誰念我今
日天涯飄泊平楚南來大江東去處處風波惡吳中何
地滿懷俱是離索常記送我行時綠波亭上泣透青
羅薄檣燕低飛人去後依舊湘城簾幕不盡山川無窮
煙浪辜負秦樓約漁歌聲斷為君雙淚傾落

醉蓬萊

為老人壽

問人間榮事海內高名似今誰比脫屣歸來眇浮雲富
貴致遠鉤深樂天知命且從容閱世火候周天金文滿
地從來活計有酒一尊有碁一局少日親朋舊家隣
里世故紛紜但蚊蚋過耳解慍薰風做涼梅雨又一般
天氣曲几蒲團綸巾羽扇年年如是

雨中花

一葉凌波十里馭風煙鬟霧鬢蕭蕭認得蘭皋瓊珮水
館冰綃秋霽明霞乍吐曙涼宿靄初消恨微顰不語少

進還收竚立迢迢 神交冉冉愁思盈盈斷魂欲遣誰
招猶自待青鸞傳信烏鵲成橋悵望胎仙琴疊忍看翡
翠蘭苔夢回人遠紅雲一片天際笙簫

二郎神七夕

坐中客共千里瀟湘秋色漸萬寶西成農事了穠稔看
黃雲阡陌喬口橘洲風浪穩嶽鎮聳倚天青壁追前事
興亡相續空與山川陳迹 南國都會繁盛依然似昔
聚翠羽明珠三市滿樓觀湧參差金碧乞巧處家家追

樂事爭要做豐年七夕願明年強健百姓歡娛還如今
日

轉調二郎神

悶來無那暗數盡殘更不寐念楚館香車吳溪蘭棹多
少愁雲恨水陣陣回風吹雪霰更旅鴈一聲沙際想靜
擁孤衾頻挑寒燄數行珠淚凝睇傍人笑我終朝如
醉便錦織回鸞素傳雙鯉難寫衷腸密意綠鬢點霜玉
肌消雪兩處十分憔悴爭忍見舊時娟娟素月照人千

里

于湖集卷三十一